

MURDDHA WAKYA
OM AWIGHNAM ASTU, DESA TATA CARA, OM NAMA CIWAYA OM CRI
PASUPATASTRA, OM AWIGNAM ASTU NAMA SWAHA.

Makadi punika pangastawan tityang majeng ring Ida Sang Hyang Widhi dumogi sidha ngamanggihin karahayuan tan kataman lara wighna maka buatan tityang sareng sami pinaka krama Desa Adat Dukuh Moncos putusing panugrahan krama Desa Adat Dukuh Moncos, makarya nyurat awig-awig Desa Adat. Desa tata cara, mawastu prasida kasidian tatujon tityang makasmi rawuhing kapungkur wekas tur maka sami pada sumuyub rniyah ngamahggeharig makadi linging awig-awig.

Sembah bhakti miyah pangastawan krama majeng ring paduka Bhatara - Bhatari sasuhunan sami, riantukan wantah malarapan panghyangning kaiih paswecan Ida Sang Hyang Widhi Wasa asung kertawaranugraha nresti jagat jangkep rawuhing sadaging nyane sami, mawinan wenten kahuripan sekala niskala ring Bhuwana Agung miyah ring Bhuwana Alit.

Manut dresta, Desane kamanggehang dados pasayuban Krama Desa rawuhing kulawarga pawongan nyane sami, mawastu raris Desane kamanggehang pinaka pawakan Bhuwana Agung, pawongan nyane kamanggehang pinaka pawakan Bhuwana Alit.

Sotaning pawakan Bhuwana Agung, Desane taler kamanggehang pinaka pawakan bhawa mahurip, sane kacirenin antuk wenlene pakilit Tri Hita Karana sane tan dados pasahang, luwire :
ha. Parhyangan, inggih punika. : sahanan genah suci maka panyiwian Desa, genah ngareana prabhawan Ida Sang Hyang Parama Wisesa. pinaka jiwa pranianan Desane;
na. Pawongan, inggih punika : Krama rawuhing warga Desa maka sami sane pinaka pawakan Tri Kaya pinaka bayu pramanan Desane, mawinan Desane prasida molah maprawretti;
ca. Palemahan, inggih punika ; sahananing pakarangan, tegal, carik, miyah setra sakakuwuban Desa Adat, pinaka sthula sariran Desane.

BANTANG AWIG - AWIG DESA ADAT

MURDDHA WAKYA

KASUKSMAN NIASA DESA ADAT

BANTANG AWIG - AWIG DESA ADAT	.ha
SARGAH PERTAMA ARAN LAN WAVIDANGAN DESA	4
SARGAH KALIH PAMIKUKUH LAN PATITIS	4
SARGAH TIGA SUKERTHA TATA AGAMA/ PARHYANGAN	5
Palet 1 Indik Dewa Yajnya	5
Palet 2 Indik Pitra Yajnya	8

Palet 3 Indik Butha Yajnya	12
Palet 4 Indik Manusa Yajnya	14
Palet 5 Indik Resi Yajnya	14
SARGAH EM PAT SUKERTHA TATA PAWONGAM	15
Palet 1 Indik Krama	15
Palet 2 Pamucuk Desa	22
Palet 3 Indik Kulkul	27
Palet 4 Indik Paruman	28
Palet 5 Indik Padruwen Desa	30
Palet 6 Indik Penyanggran Banjar	31
Palet 1 Indik Pawiwahan	31
Palet 8 Indik Santana	33
Palet 9 Indik Nyapian	35
Palet 10 Indik Warisan	36
SARGAH LIMA SUKERTA TATA PALEMAHAN	39
Palet 1 Karang, Tegal Ian Carik	39
Palet 2 Setra	40
Palet 3 Papayonan	40
Palet 4 Wawalungan	41
Palet 5 Wawangunan	42
SARGAH ENEM WICARA, BHAYA,DUSTA LAN PAMIDANDA	42
Palet 1 Indik Wicara	42
Palet 2 Indik Bhaya Ian Dusta	43
Palet 3 Indik Pamidanda	44
SARGAH PITU NGUWAH-NGUWUHIN AWIG AWIG	45
SARGAH KUTUS SAMAPTA	46
LEPIHAN	48

SARGAH PERTAMA
ARAN LAN WEWIDANGAN DESA
Pawos 1

- (1) Desa Adat puniki mawasta Desa Adat Dukuh Moncos
- (2) Jebar kakuwub wawidangan nyane mawates nyatur :
 - ha. Sisih wetan/kangin Desa Adat Ayunan
 - na. Sisih kulon/kawuh Desa Adat Banjar Sayan
 - ca. Sisih lor/utara Desa Adat Sobangan
 - ra. Sisih kidul/kelod Desa Adat Baha
- (3) Desa puniki kawangun antuk karang desa utawi gebogan krama, turmaning kepah dados tigang tempek, luire;
 - ha. Tempek Kaja
 - na. Tempek Tengah
 - ca. Tempek Kelod

SARGAH KALIH
PAMIKUKUH LAN PATITIS

Pawos 2

- (1) Desa Adat Dukuh Moncos ngamanggehang pamikukuh makadi ring sor
 - ha. Pancasila;
 - na. Undang-Undang Dasar 1945;
 - ca. Tri Hita Karana manut Sadacara Agama Hindu;
 - ra. Hak Azasi Manusia utawi
 - ka. Uger - uger saking Guru Wisesa indik Desa Adat;

Pawos 3

- (1) Luwir Patitis Desa Adat Dukuh Moncos
 - ha. Mikukuhin miwah ngarajegang Sang Hyang Agama Hindu;
 - na. Ngutamayang/Nginggilang tata prawertine magama;
 - ca. Ngajegang kasukertan desa saha pawongannia sekala lan niskala
 - ra. Ngajegang megama Hindu Bali

SARGAH TIGA
SUKERTHA TATA AGAMA/PARHYANGAN
Palet I
Indik Dewa Yajnya

Pawos 4

- (1) Palinggih panyiwian desa ring wawidangan Desa Adat Dukuh Moncos luire:
 - ha. Pura Swagina Pura Ulun Swi
 - na. Kahyangan Tiga : Pura Desa, Pura Puseh, Pura Dalem;
 - ca. Pura Prajapati
 - ra. Pura Melanting
- (2) Rahina piodalan soang-soang kahyangan inucap, kadi ring sor :
 - ha. Ring Kahyangan Tiga, luire :
 - (1) Pura Desa , ri kala Buda Manis Uku Prangbakat
 - (2) Pura Puseh, ri kala Buda Umanis Uku Prangbakat
 - (3) Pura Dalem, ri kala Buda kliwon uku sintia
 - (4) Pura Kayangan Desa Pura Ulun Swi rikala Anggara Kasih Medangsia
 - (5) Pura Melanting ,ri kala saniscara kliwon wuku wariga
 - (6) Pura Taman Beji Jenuk Pujawali rikala purnama Kapat
 - (7) Pura ring Tuwed Pujawali rikala Purnama Kapat
 - (8) Piodialan Ida Ratu Gede rikala Anggra Kliwon Tambir
 - (3) Pangaci ring pura inucap manut kecap sastra agama, saha kalaksanayang nista, madya, utama manut kawentenan lan pararem;
 - (4) Pangempon soang-soang pura manut dresta kadi ring sor :
 - ha. Kahyangan Ulunswi Kaempon antuk Desa Adat Dukuh Moncos rauh ring Beji
 - na. Pura Desa kaempon Desa Adat Dukuh Moncos
 - ca. Pura Puseh kaempon antuk Desa Adat Dukuh Moncos
 - ra. Pura Dalem kaempon antuk Desa Adat Dukuh Moncos
 - ka. Pura Prajapati kaempon antuk Desa Adat Dukuh Moncos
 - da. Pura Taman Jenuk Kaempon Antuk Desa Adat Dukuh Moncos
 - ta. Pura Ring Tuwed Kaempon Antuk Desa Adat Dukuh Moncos
 - sa. Petapakan Ida Ratu Gede Kaempon Antuk Desa Adat Dukuh Moncos
 - wa. Pura Melanting kaempon antuk Desa Adat Dukuh Moncos.

Pawos 5

- (1) Ring soang-soang pura inucap kawentenang pamangku;
- (2) Ngadegang pamangku manut dudonan :
 - ha. Turunan utawi ngawaris,tunggla sumbah
 - na. Nyanjan utawi masemurang, soang-soang mapiteges mapinunas ring ajeng panataran utawi ring Pura Desa,kasarengin antuk krama Desa sami, lan sapanunggilan ipun;
- (3) Tan kawenang kewenangan kaangen pemangku luire :
 - ha. Cedungga luire peceng, perot, cungih lan sapanunggilan ipun;
 - na. Sang sapasira ugi sane tan kapatutang.

- ca. Sakit ila, ayan, buduh/wiadin edan;
 - ra. Sane madruwe kasucian urip nentan becik;
- (4) Prabea kapamangkuan :
- ha. Ritatkala Pawintenan, kamedalin saha kalaksanayang antuk sang ngadegang makadi krama desa utawi pangempon pura soang-soang;
 - na. Pitra yadnya ri wekas prade jro mangku seda, patut kasungkemin antuk krama desa adat nyantos puput malinggih ring rong tiga, indik prabia manut pararem;
 - ca. Prade Jero mangku balu ,diprade mekayunan ngambil rabi malih prabiya mabersih ring palinggih /mawinten patut saking desa adat Pamangku patut ngamanggehang sasananing pamangku, luire tan wenang ajejuden miwah sane siosan;

Pawos 6

- (1) Swadarmaning pamangku luire:
- ha. Ngenterang upacara piodalan ring kahyangan utawi ring soang-soang pakubon krama;
 - na. Tan wenang salab-sulub, yan mamurug wenang pamangku inucap nyepuhin raga;
 - ca. Prade silih sinunggil pamangku kapialang utawi cuntaka, kengin nyelang pamangku siosan utawi nuwur sang sulinggih;
 - ra. Samalih yan sampun pamangku ngayah tigang rahina ring pura, kancit wenten kulawarganya padem/lini, pamangku inucap tan keneng cuntaka, sakewanten pamangku tan hudal selami piodalan;
- (2) Petias utawi olih-olihan pamangku luire:
- ha. Panyolasan miwah sarin canang;
 - na. Polih Busana arangsukan manut Pararem Desa Adat Dukuh Moncos
 - ca. Luput pakaryan Ian rara'mpen/raramon, padagingan keni kadi patut;
 - ra. Nyening Pemangku sungkan, nyantos ngeranjing ke Rumah Sakit polih aturan saking Desa manut Pararem

Pawos 7

- (1) Pamangku kagentosin riantukan :
- ha. Seda utawi lina;
 - na. Pinunas ngraga manawi kageringan Ian sapanunggilan ipun;
 - ca. Sampun yusa lingsir
 - ra. Kawusan antuk krama manawi malaksana sane tan patut (asta dusta);
- (2) Prade pamangku kawusang sangkaning malaksana asta dusta, keni pamidanda saha ngwaliang prabea pawintenan pecak;

Pawos 8

Kasukertan khyangan ring desa :

- (1) Sane nenten kalugra ngaranjing kapura Iwire :
- ha. Sang katiban cuntaka, makadi sebel raga :
 - 1) Sebel kandel, ngraja sewala, selami dereng mabersih;
 - 2) Sebel sangkaning ngembasan putra, sajeroning sane istri 42 rahina, sane lanang sampun kepus udel
 - 3) Sebel pangantenan, sadurung mabiakala;
 - 4) Sebel sangkaning kalayu sekaran utawi wenten kapademan manut sengker, manut pararem
 - na. Sang patita utawi panak babinjat / sampun kaperas/ kaupakara dados sampun kapura
 - ca. Makta sahananing sane kasinanggeh ngaletehin;
 - ra. Wawalungan suku pat, sajawaning ri kala mapepada;
 - ka. Mabusana sane tan manut kadi tata caraning ngaranjing kapura;
 - da. Anak alit sadurung mayusa tigang sasih;
 - ta. Sang Duratmaka / Wong Edan
- (2) Busana ngranjing kapura wenang nganutin dresta minakadi:
- ha. Ritatkala ngaturang ayah, mawastra Ian nyelempot, lan madestar
 - na. Ritatkala ngaturang sembah, mabusana jangkep;
 - ca. Siosan kadi ring ajeng nenten kalugra, sajawaning sampun pituduh prajuru;
- (3) Parilaksana tan kawenangan ring pura, luire :
- ha. Masuara sane kasinanggeh wak purusya, wak capala;
 - na. Makoratan/mabacin, mawarih, masanggama;
 - ca. Masumpah utawi macoran sajawaning pituduh prajuru desa;
 - ra. Ngias raga sajawaning sulinggih miwah pandita;
 - ka. Munggah tedun ring palinggih sajawaning pituduh parajuru desa;
 - da. Tan dados menyusu / menyoyian ring utama mandala
- (4) Sang mamurug kadi kecape ring ajeng, keni pamidanda pamrayascita sapatutnya

Pawos 9

- (1) Yan wenten jadma karawuhan ring pura, kengin kaselehin. Nanging tan wenang kapintonin
- (2) Prade khyangan kahanan dhurmanggala, minakadi kapanca bhaya, pamangku patut digelis nyadokang ring prajuru mangda marumang krama desa tur ngawentenang upacara sapatutnya;

Palet 2 Indik Pitra Yadnya

Pawos 10

Dudonan pamargin Pitra Yadnya.

- (1) Pangupakaran sang padem utawi seda :

- ha. Antuk mendem utawi ngeseng, makacihna pakingsan ring Ibu Pertiwi utawi ring Bhatara Brahma.
 - na. Atiwa-tiwa (upacara pangabeanan/palebon);
 - ca. Prade wenten sang sane padem tatiga, nenten kawenangan ngaben sinarengan, inggian pemargi, sane ring tebenan patut mekingsan, yening wenten sane padem malih, ring luanan patut meneng.
- 2) Upakara-upacara Pitra Yajnya riwusan kaabenang mawastu munggah daun bingin (ngroras) ri sampune punika wawu kamargiang ngalinggihang Dewa Hyang (Bhatara -Bhatari);
 - 3) Sane kangkat keabenang sane sampun maketus untu
 - 4) Sane durung maketus untu patut ngelungah
 - 5) Sane lampus/padem nenten kedadosang Kremasi, yen mamurub nenten polih patis, tirta Khayangan tiga lan olih-olihan saking Desa.

Pawos 11

Swadharma Ian tategenan krama prade wenten sinalih tunggil warga padem utawi seda :

- (1) Sang kaduhkitan patut:
 - ha. Nyadokang ring prajuru adat tur nunas tatimbang ring kawentenan pamargin nyane;
 - na. Ngaturin krama Banjar mangda ngarombo makarya eteh-eteheh sawa kadulurin panyembrama canang sakasidan antuk;
- (2) Swadarmaning Banjar/Desa :
 - ha. Kelian banjar maritatas pamargin sang kaduhkitan, napi pacang kapendem makingsan rihin utawi lantur kaabenang;
 - na. Prade kapendem, raris kawentenang kulkul patahu olih kelian banjar nyane;
 - ca. Panyanggran Banjar salanturnya :
 - 1) Soang-soang krama banjar nedunin patus manut dresta;
 - 2) Ngarombo ngaryanin eteh-eteheh sawa, saha kasarengin antuk krama, miwah sang sane rauh;
 - 3) Rikala wenten tatangunan ring palinggih layon kadadosang mamargi, nanging ngamolih krama a tempek tur keluarga, nentan ngamolihang gong tur nenten nyuarang kul-kul
 - 4) Sami krama Banjar nganter kasetra jantos puput;
 - 5) Tan kengin malelet langkungan ring 7 (pitung) rahina, salantur ipun patut polih pagebagan manut paetangan kelian patus/banjar;
 - 6) Tan kalugra, nginepang bangbang;
 - 7) Pamargin pengaben / kesetra patut galah minggik /murwa surya
 - 8) Rikala pujawali ring khayangan, sajeroning tigang rahina lan galungan yen wenten pangabeanan sane maduwe kalayu sekar. Polih pengayah saking desa wantah dasa diri karang ayahan kaenter antuk kelihan tempek.

Pawos 12

- (1) Sane kasinanggeh kacuntakan sekadi ring sor :
- ha. Cuntaka sangkaning kalayu sekaran/padem;
 - na. Cuntaka sangkaning ngraja sewala;
 - ca. Cuntaka sangkaning ngembasang putra;
 - ra. Cuntaka sangkaning karuron;
 - ka. Cuntaka sangkaning pawiwahan;
 - da. Cuntaka sangkaning gamia gamana;
 - ta. Cuntaka sangkaning salah timpal;
 - sa. Cuntaka prade wenten anak istri sane mobot nenten kaupakara pabyakawonan tur pawidhi widhana;
 - wa. sangkaning mamitra ngalang;
 - la. Cuntaka sangkaning wenten anak istri ngawentenang putra sadurung maupakara, pabyakawonan tur pawidhi widhana;
- (2) Sengker cuntaka manut kawentenane :
- ha. Cuntaka kalayu sekaran, cuntakanyane nyantos masapuh-sapuh macaru / ngerorasang
 - na. Cuntaka ngraja sewala, 3 rahina ngawit saking ngraja sewala utawi salamining ngraja sewala;
 - ca. Cuntaka ngembasang putra, 42 rahina (abulan pitung dina) ngawit saking putrane embas, utawi ngantos sampun kaupakara makambuhan tur maprayascita manut agama, pemargin sang sane istri /sane lanang polih kepus udel
 - ra. Cuntaka sangkaning karuron abulan pitung dina (42 rahina), sane lanang lan istri tur sampun maprayascita;
 - ka. Cuntaka sangkaning pawiwahan, cuntakanya ngantos sasampun kamargiang pabiakawonan;
 - da. Cuntaka sangkaning gamia gamana, cuntakanya ngantos sasampune ka palasang/masapihan tur sampun kawentenang pamrayascita raga miyah pamrayascita desa adat lan kahyangan;
 - ta. Cuntaka sangkaning salah timpal kapuputang sakadi ring agama Agama Hindu tur dresta miyah adat sane manggeh;
 - sa. Cuntaka sangkaning anak istri mobot nenten madasar antuk ngamargiang upacara pabyakawonan, cuntakannia ngantos kawentenang upacara pabyakawonan;
 - wa. Cuntaka sangkaning mamitra ngalang 'cuntakania ngantos kawentenang pamargi parabian Ian kamargiang upacara pabyakawonan;
 - la. Ngembasang putra nenten kawentenang upacara pawidhi widhana, cuntakania ngantos wenten putrane mameras sang putra, tur sampun kawentenang upacara manut sastra Agama Hindu;

(3) Cuntaka sangkaning kalayu sekaran utawi sangkaning kamatian.

ha. Mapendem cuntakan nyane

- 1) Cuntaka/sebel banjar rawuhing 3 rahina riwusan mendem utawi sasampun polih prayascita (masapuh-sapuh);
- 2) Keluarga sajeroning pakarangan ngantos roras rahina;
- 3) Keluarga pangapit nyantos roras rahina
- 4) Tunggal Sumbah nyantos roras rahina
- 5) Sangkaning Purusa roras rahina
- 6) Sangkaning Pradana ngantos pitung rahina

na. Atiwa-tiwa utawi ngaben cuntakania :

Sang nyambut karya Pitra Yajnya cuntakanya ngawit saking ngarancang karya rawuh riwus yadnyania (mapegat);

(4) Tan keneng cuntaka luire

ha. Sulinggih lan Pamangku Kahyangan Tiga;

na. Rikala piodalan;

1. Prajuru Desa
2. Sekhe Gong
3. Pecalang

Pawos 13

- (1) Atiwa-tiwa (pangabenan) kamargiang antuk :
 - ha. Nyawa Resi utawi nenten ngupapira sawa, santukan tan ngagah utawi manawi sawa tan kakeniang;
 - na. Sawa prateka;
- (2) Panemaya pangabenan wenten:
 - na. Ngaben dadakan (bah bangun), kadadosang sajeroning Krama Desa
 - na. Ngaben ngamasa;
- (3) Dudonan pangabenan ngawit saking ngagah (lina), ngeseng ngantos pangiriman utawi nganyut;

Pawos 14

- (1) Papatusan pangabenan wenten :
 - ha. Ngaben ngamasa patus nyane manut dresta miwah pararem.
 - na. Ngaben dadakan patus nyane pateh sakadi patus padem mapendem lan kanutang ring dresta lan pararem.
- (2) Upacara Pitra Yadnya sajangkep nyane kamargiang mabantang antuk Awig-awig Desa Adat Ian panglaksanan nyane kamanggehang tur kamargiang manut dresta.

Palet 3

Indik Bhuta Yajnya

Pawos 15

- (1) Bhuta Yadnya inggih punika upakara-upacara biakala ring prathiwi lan khayangan, sarwa prani lan upakara-upacara ring bhuta kala;
- (2) Upacara pabyakala ring sarwa prani luire :
 - ha. Ring sarwa tumuwuh kamargiang rikala Tumpek pangatag, (Saniscara Kliwon Wariga);
 - na. Ring sarwa ingon-ingon rikala Tumpek Andang (Saniscara Kliwon Uye);
 - ca. Upacara pakala-kalan manusia manut wiguna kabawos pabiakala;
- (3) Upacara pabiakala ring pertiwi, kahyangan Ian babutan kawastanin macaru;
- (4) Pacaruan inucap ring ajeng nista, madya, utama manut wiguna kadi ring sor :
 - ha. Ekasata;
 - na. Pancasata:
 - ca. Panca sanak;
 - ra. Panca kelud;
 - ka. Resi Gana

- da. Balik Sumpah; manut paruman desa adat
 - ta. Tawur Agung; manut paruman desa adat Pancasata;
- (5) Sajawaning kadi ring ajeng taler kawentenang upacara :
- ha. Majot-jotan utawi yadnya sesa nyabran sasampun wusan maratengan;
 - na. Masapuh-sapuh ri kala pacang wali ring pura;
 - ca. Sasih ketiga, sasih kapitu macaru ring tanggun desa, Ida Bhatara Tapakan Ratu Gede Medal
 - ra. Sasih Kapat Ida Bhatara tapakan Ratu Gede lunga ka Tuwed
 - ka. Yening jagi ngamedalan Ida Ratu Gede Lingsir rikala kabrebehana, indik upakara patut mesamleh kucit Butuan ritatkala Ida tedun, lan ring pempatan sane badelod, ring pempatan baler kesamleh antuk itik belangkalung lan ring Ida mesineb taler kesamleh itik belangkalung

Pawos 16

- (1) Nangken ngawarsa rikalaning Tilem Kasanga kawentenang Tawur Kasanga, katah kabawos ngrupuk, maka cihna pacang mapag rahina Panyepian benjangne.
- (2) Upacara Penyepian sasampun kamargiang pangrupukan benjang nyane patut kamargiang catur brata panyepian, luir ipun :
 - ha. Amati geni tan kengin ma api-api;
 - na. Amati karya tan kengin nyambut karya;
 - ca. Amati lalangan tan kengin maoneng-onengan, masuara ghora, maklecan lan sapanunggilan ipun;
 - ra. Amati lelungaan tan kengin malancaran merika-meriki;
- (3) Pabratan inucap kamargiang saking semeng ngantos semeng benjang nyane.
- (4) Sang mamurug kecapping ajeng keni pamidanda manut pararem ring banjar/tempek soang-soang sane kamargiang antuk patilik desa (pecalang desa);
- (5) Riwus rahina Nyepi (benjangne) maka cihna pangawit Icaka Warsa anyar, patut soang-soang warga desa sami saling ngaksama (Dharma santhi).

Palet 4

Indik Manusa Yadnya

Pawos 17

- (1) Manusa Yadnya inggih punika upakara-upacara, dharmaning manusa, ngawit saking kamargiang dharmaning mapawarangan ngantos kamargiang upacara pawidhi widanan.
- (2) Yening wenten krama masakapan nenten kasaksi antuk prajuru kabaos tan sah
- (3) Upacara kadi ring ajeng madudonan sakadi ring sor :
 - ha. Magedong-gedongan kamargiang risampun bobotane mayusa 6 sasih;
 - na. Duk rare medal utawi embas (lekad rare);
 - ca. Kepus udel;
 - ra. Roras rahina;
 - ka. Tutug akambuhan (42 rahina);
 - da. Tigang sasih (3 sasih);
 - ta. Pawetuan/otonan (6 sasih);
 - sa. Ngempugan (mentik untu kapartama);
 - wa. Tutug kelih (ngraja wadone, ngembakin lanange);
 - la. Matatah/mapandes;
 - ma. Mawiwaha;
 - ga. Mawinten;
 - 1). Upakara-upacara inucap nista, madya utama manut sastra agama saha catur dresta, maka buatan desa dresta, ngawinang sima cara desa;

Palet 5
Indik Resi Yajnya
Pawos 18

- (1) Sang pacang madeg sulinggih. pandita utawi pinandita pinaka sang sadaka, Balian Sonteng, Kubayan, saluwire jagi ngenterang yajnya patut masadok ring prajuru desa, kalih Parisadha Hindu Dharma;
- (2) Prajuru desa patut nitenin tur wenang ngalangin prade wenten kacihna lempas ring kakecap miyah drestane, tur sareng nyaksinin upacara saha nyobyahang ring paruman desa tegep rikalaning kawenangan yadnya.
- (3) Krama desa patut ngaturang ayah sapamadeg miyah ring panglepasan sang sulinggih riwekas sane katuntun antuk prajuru;

Pawos 19

- (1) Sang Sulinggih patut ngarihinan ngayomin pamargin upacara ring wawidangan jagat Desa Adat Dukuh Moncos sasampun punika wawu muputang yadnya kajebar jagat tiosan utawi kadura desa;
- (2) Krama Desa sareng nitenin katuntun antuk prajuru, mangda sahanan yadnya sane kamargiang kaicen pamuput olih Sulinggih, Pandita utawi Pinandita manut kawenanganya soang-soang;

SARGAH EMPAT
SUKERTHA TATA PAWONGAN

Palet 1

Indik Krama

Pawos 20

- (1) Sane kabawos krama desa inggih punika kulawarga sane, meagama Hindu saha ngomong karang desa utawi jumenek ring wawidangan desa adat Dukuh Moncos.
- (2) Sajaba punika sinanggeh tamiu, sane kabinayang dados kalih, inggih punika sane magama Hindu miwah siosan Hindu, sane dudonan ipun makadi ring sor :
 - ha. Krama Adat inggih punika, krama sane nyarengin adat, magarna Hindu, sampun marabian lan tedun mabanjar Adat, mipil tur sareng nyungkemin Kahyangan Tiga, Desa Adat Dukuh Moncos.
 - na. Krama tamiu inggih punika, krama saking dura Desa Adat Dukuh Moncos, sane magama Hindu, nenten mipil sakewanten sareng nyungkemin Kahyangan Tiga Ian nganutin dresta Desa Adat Dukuh Moncos.
 - ca. Krama tamiu nenten nyarengin ngerereh karang desa.
 - ra. Karang ayahan desa nenten wenang kaadol.
 - ka. Nenten wenang nyibak karang desa.
 - da. Krama tamiu sane tios megama Hindu, tur sane numas tanah, jenek ring wewidangan desa adat Dukuh Moncos patut nyungkemin Khayangan Tiga

Pawos 21

Krama Desa Adat Dukuh Moncos wenten 4 (petang) soroh:

- (1) Krama Wedan : krama sane sampun jumenek tur madesa adat wit saking leluhurania;
- (2) Krama ngarep inggih punika kulawarga sane malarapan wed utawi pangrawuh saking warga desa siosan saha ajeg pawiwhania;
- (3) Krama, tan ngarep, luwire :
 - ha. Silih tunggil kulawarga sane tan ngarep ring desa, kemawon ring banjar kantun ngarep;
 - na. Krama Paron : krama saking dura desa sane sampun masadok ring prajuru banjar Ian desa, Ian sampun madruwe tanah karang pumahan, tur sampun jenek ngawit 3 (tigang) sasih nyantos 10 (dasa) warsa;
 - ca. Krama Panyade : krama sane mewiwit saking Desa Dukuh Moncos sane sampun matilar dados krama adat Desa Adat siosan, nanging waris ipun kantun ring Desa Adat Dukuh Moncos turmaning mawali malih dados krama Desa Adat Dukuh Moncos, polih ring karang ayahan desa kemanten.
 - ra. Krama Pangele inggih punika krama desa adat Dukuh Moncos, utawi krama saking, dura desa sane wenten pakilitan ring krama wedan lan jumenek ring krama wed.

- ka. Krama daa taruna inggih punika krama sane mayusa 15 nyatos 30 warta sane durung marabian;
- da. Krama datu : krama sane mayusa lintangan ring 30 warta tur nenten naenin ngamargiang kramaning alaki rabi nyantos lanipus;
- ta . Krama Balu inggih punika krama sane katinggalin sangkaning sane istri utawi sane lanang radem utawi sangkaning nyapihan. Krama balu kepah dados 4 (petang) soroh :
 - 1. Balu makrambian : Balu sane sampun madruwe pianak cucu nangin nenten marabian malih;
 - 2. Balu ngempu : Balu sane madruwe pianak kantun alit;
 - 3. Balu ngatung : Balu sane nenten madruwe pianak utawi santana;
 - 4. Balu ngelisting : Balu sane nenten madruwe pianak, arta warisan lan sameton;

Pawos 22

Tata caraning ngaranjing dados krama desa :

- (1) Ngawit dados krama desa inggih punika :
 - ha. Sangkaning ngamong karang desa;
 - na. Mawiwit pawiwahan;
- (2) Panemaya tedun makrama desa :
 - ha. Nyabran dina Galungan saha majalaran antuk tetengeran arep ring krama sane ngamong ayahan desa;
 - na. Marep ring krama Desa sane mawit saking ngarangin, kasulurang palelintihan ipun ngelanturin mapekeling ring Khayangan Tiga;
- (3) Sang saking siosan desa yanng sareng tedun makrama desa ring Desa Adat patut keni cecingkreman, sane ageng nyane kasulurang; manut pararem
- (4) Yan wenten krama saking siosan desa sareng ngranjing makrama desa ring Desa Adat patut kadulurin antuk likita saking Desa. wednyane sane tegep lan jangkep;

Tata caraning ngaranjing dados tamiu :

- (1) Masadok ring Kelian Desa Adat lan Kelian Dinas;
- (2) Naur prabea manut pararem Banjar/Desa Adat;
- (3) Patut mesadok selangkung saking serahina

Pawos 23

Tateganan miwah swadarma krama Desa Adat luire :

- (1) Tategenan krama luire :
 - ha. Krama ngarep, keni urunan miwah ayahan mamungkul;
 - na. Krama balu, keni ayah manut kawongannya :
 - 1) Balu ngelisting, lanang utawi istri keni ayahan lanang utawi istri.

- 2) Balu makrambian, lanang utawi istri sane madruwe santana lanang utawi istri sampun mayusa 17 (pitulas) warsa kangkat sampun ngayah.
 - 3) Balu Nyapian, kadadosang luput papeson sakewanten keni ayah manut arah-arahan Banjar/Desa Adat yening balu lanang ayah lanang, balu isri ayah istri;
 - ca. Krama pangele, keni ayah-ayahan sakadi mararesik ring Kahyangan Tiga, banjar lan sane tiosan manut ring kawigunan nyane
- (2) Krama Desa Adat kadadosang:
- ha. Mapuangkid utawi tan tedun ngayah luire :
 - 1) Ritatkala mapawangunan/nasarin. Ngeraabin sanggah, piasan, bale daja, bale dangin, bale dauh, klumpu miwah pawon, dados mapwangkid manut pararem
 - 2) Ritatkala mayadnya, mapetik, nyakapang, masangih, mapasaksi, Ian patirtan,polih mapuangkid manut pararem
 - 3) Maluasan utawi ngaluang;
 - 4) Matepetin Ian siosan, matepetin selami pitung rahina sane polih puangkid a pemuusan.
 - 5) Mapuangkid sakit salami (tigang) rahina, nenten dados medal, yaning sampun arahina kenak (seger) mangda masadok ring prajuru; - na. Nyade mapiteges wusan ngayah, ri sampun mayusa 70 (pitung dasa tiban) warsa utawi lintang;
 - ca. Panyeledihi nyade wiadin nyaluk ayah ri sampun mayusa 17 (pitulas) warsa;
- (3) Swadharmaning Krama Desa Adat Dukuh Moncos luwire :
- ha. Satinut ring sadaging Awig-awig, Pararem Ian Pasuaran Desa Adat Dukuh Moncos
 - na. Tan maren sareng mautsaha, mangda desane prasida nyujur patitis ring ajeng;
 - ca. Sayaga sareng natakin panes tis kertiyanan Desa Adat Dukuh Moncos
 - ra. Keni paturunan, peson-peson lan ayahan mamungkul;
 - ka. Saluire krama sane nerima tamiu patut mesadok ring prajuru Desa lintang ring 24 jam
- (4) Swadharmaning Krama Tamiu Adat Dukuh Moncos luwire;
- ha. Satinut ring tatiwak Desa Adat ngeninin indik ngupadi kasukertan Desa Adat ring sekala, niskala;
 - na. Tan kengin nungkasin kertiyanan Desa Adat Dukuh Moncos
 - ca. Patut masadok ring kelian banjar ritatkala narima tamiu nyantos lintang ring 24 jam
 - ra. Ngaturang punia Ian ayah ring parhyangan manut kabuatan;
- (5) Swadharmaning Tamiu, inggih punika :
- ha. Satinut ring tatiwak Desa Adat ngeninin indik pawongan lan palemahan;
 - na. Tan kengin nungkasin kertiyanan Desa Adat;
 - ca. Patut masadok ring kelian banjar ritatkala narima tamiu nyantos lintangan ring 24 jam;
 - ra. Krama Tamiu patut mepunia.

Pawos 24

Kapatutan krama Ian tamiu :

(1) Kapatutan Krama Adat sakadi ring sor :

- ha. Polih pasayuban saking desa;
- na. Polih kasukertan miwah kasucion dewek, prahyangan miwah karang nyane;
- ca. Polih kasukertan padruwen nyane sowang-sowang;
- ra. Ngamedalang usul ritatkala wenten paruman ring desa sane mabuat;
- ka. Dados prajuru ring banjar utawi desa;
- da. Polih pamutus saking prajuru ritatkala wenten wicara;
- ta. Polih laluputan manut pararem;

(2) Kepatutan Krama Tamiu :

- ha. Patut madana punia ring Desa / Banjar Adat, manut pararem;
- na. Polih pasayuban marupa pitulung rikanjekan katiben pancabhaya;
- ca. Polih pamutus saking prajuru ritatkala wenten wicara;

(3) Kepatutan Tamiu:

- ha. Patut madana punia ring Desa / Banjar Adat, manut pararem;
- na. Patut polih pasayuban marupa pitulung rikanjekan katiben pancabhaya;
- ca. Polih pamutus saking prajuru ritatkala wenten wicara;
- ra. Tamiu sane nentan wenten pasadok ring prajuru nentan polih pasayuban ring desa adat

(4) Sinalih tunggil krama Desa lan tamiu nentan kadadosang ngajak wong wadon tuna susila granjing miwah ngrerep utawi ngaryanan genah meseneng-seneng mekardi warga sane siosan merasa terganggu ring wewidangan Desa Adat, sapasira ugi sane piwal, patut keni pamidanda manut pararem;

(5) Krama desa lan tamiu tan kadadosang makta, ngangge, madruwe sarana, narkoba Ian barang - barang sane terlarang, sane ten manut ring uger-uger Guru Wisesa, sapasira ugi sane tiwal, patut keni pamidanda manut pararem;

Pawos 25

Wusan dados Krama Desa :

(1) Sangkaning

- ha. Seda;
- na. Pinunas ngaraga;
- ca. Kanorayang. malantaran piwal ring Awig-awig miwah Pararem Desa, utawi tan satinut ring pituduh Prajuru sajeroning indik nyupat sikian, minakadi nenten prasida ngesehin prawerti;

(2) Sang wusan dados krama desa taler kabawos wusan mabanjar, mangda nenten kabawos; pak ngulanting;

- (3) Sang wusan dados krama desa tan polih pah-pahan druwen desa utawi banjar, tur tan polih pasayuban malih sajeroning ala-ayu;
- (4) Sang Kanorayang dados malih tedun makrama desa yaning sampun maseh parisolah ipun tur alarapan antuk katerima ring banjar adat / desa adat, maweweh pamogpog manut pararem;
- (5) Prade sangkaning rahayu, polih lekita bukti patilar saking prajuru desa;

Pawos 26

Ayah-ayahan krama,

- (1) Satunggil krama, manut paetangan nyane, keni ayah-ayah sekadi ring sor :
 - ha. Ayahan utama inggih punika ayah sane kamargiang olih krama sane ngamargiang swadharma eka jati utawi dwijati.
 - na. Ayahan ngarep inggih punika ayah sane kamargiang olih krama sane dados krama adat, sane jangkep alaki rabi. Ayahan ngarep mapiteges paturunan, peson-peson miwah ayahan mamungkul;
 - ca. Ayah Pangele patut tedun ngayah ritatkala wenten pituduh prajuru
 - ra. Krama sane lepas saking karang wed/utawi numbas karang utawi tegal ring wewidangan Desa Adat, yening sampun ngewangun kemulan taksu patut tedun makrama dados krama ngarep.
 - ka. Ayahan balu inggih punika ayah sane kamargiang olih krama balu sekadi ring sor :
 - 1). Balu makrambian, keni ayah Ian urunan aparo;
 - 2). Balu ngempu, keni ayah Ian urunan aparo;
 - 3). Balu ngatung, tan keni ayah, nanging keni urunan aparo; :a. Ayahan daa taruna : lput manuk;
- (2) Soang-soang ayahan punika wantah kamargiang siki kemanten, manut kawentenan krama inucap;
- (3) Sahananing krama sane sampun munggah daa truna, soang-soang patut sareng ngayah sane kawastanin ayah daa truna;
- (4) Ayah daa truna punika kapupulang sajeroning Sekaa Truna;
- (5) Sekaa Truna punika patut wenten ring soang-soang Banjar Adat / Desa Adat.
- (6) Krama Adat wenang nyade ayah, sane mateges mademang ayahan, yan sampun kapastika, luwire:
 - ha. Sungkan tahunan
 - na. Yan sampun madruwe pangertos utawi panyeledihi;
 - ca. Risampun mayusa 70 warsa;
- (7) Krama Adat kadadosang :
 - ha. Mapuangkid utawi tan tedun ngayah / parum :
 - (1). Rikala nangun yadnya, kaluwasan masengker dewasa;

- (2). Keni dadauhan
- (3). Kapialang, luwire : sungkan, matepetin, kalayusekaran, lan sakancan punika;
- na. Dados nyudi patajuh (kawakilang) ring warga/krama tiosan, sane sampun munggah daa truna;
- ca. Tan dados mogpog utawi wtug ayahan antuk artha brana utawi ngampel, prade makarya ring dura desa

Pawos 27

Tata titi Krama Desa utawi Tamiu, sane nampi krama tamiu utawi tamiu :

- (l) Krama Desa utawi tamiu sane nampi krama tamiu utawi tamiu nyantos marerepan
 - ha. Mangda masadok ring kelian banjar, arahina saking ngawit marerepan ring genah sang narima;
 - na. Yaning krama tamiu utawi tamiu punika madunungan/ rawuh_asasih./ Kelian Banjar patut nureksain kabuatan nyane madunungan, kaadungang ring ilikita sane ninasang kabuatan ipune;
- (2) Yening kabuatan nyane tan manut ring sane katunasang, Kelian Banjar wenang ngawenangan krama tamiu utawi tamiu punika;
- (3) Yaning krama adat, krama tamiu utawi tamiu punika jenek rawuhing asasih taler durung kasadokang, krama desa utawi tamiu sane nampi patut keni pamidanda manut pararem;

Palet 2

Pamucuk Desa

Pawos 28

Pamucuk Desa Adat inggih punika :

- (1) Sabha Desa
- (2) Kertha Desa
- (3) Prajuru Desa.

Sabha Desa

Pawos 29

- (1) Sabha Desa, inggih punika paruman desa sane taler kabawos paruman agung desa adat sane kamiletin antuk krama maka sami miyah prajuru adat sami sane matatuson pacang nepasin sahananing wicara sane mawiwit saking awig-awig lan sane mapakilitan ring tata adat, agama, budaya miyah sahananing pidabdab pewangunan ring desa adat sane muatang pamutus ring sajeroning paruman agung;

- (2) Manut makadi dresta sane manggeh ring adat, sahananing pamutus-pamutus sane kamedalang tur kamanggehang ring desa adat dumogi panglaksanan adat-istiadat prasida mamargi ajeg patut kaputusang ring sajeroning paruman desa sane rrawasta sabha desa;

Kertha Desa

Pawos 31

- (1) Kertha Desa inggih punika genah prajuru desa lan krama desa adat nunas dharma tatimbang yening wenten nepasin daging awig-awig miwah wewangunan.
- (2) Swadharma Kertha Desa, wenang mapaicara saluwiring dharma tatimbang ring Prajuru Desa, makadi :
- ha. Indik prajuru desa sane singsal ngemargiang awig - awig;
 - na. Indik krama desa sane pacang nguwuhin awig-awig Desa Adat;
 - ca. Indik wenten wicara ring Desa Adat sane kasengguh perkara;
- (3) Indik Kertha Desa patut ngicenin dharma tatimbang lan ngawantu prajuru desa lan krama desa yening wenten pikobet indik pamargin awig-awig;

Tatacara Ngadegang Kertha Desa

Pawos 32

- (1) Kertah Desa akeh nyane 1 diri nyantos 3 diri, manut kabuatan; Sane dados kadegang Kertha Desa luwirnya :
- ha. Mawiwit saking krama ngarep, naenin dados prajuru desa;
 - na. Wikan ring hukum adat / agama lan hukum Nasional;
 - ca. Ritatkala kacawis, mayusa sakirangnya 40 warsa,
 - ra. Kasudi olih Prajuru Desa, utawi Tedung/Pamucuk Desa suwen nyane dados Kertha Desa 5 warsa;

Prajuru Desa

Pawos 33

- (1) Sane kasinanggeh Prajuru Desa inggih punika :
- ha. Bandesa;
 - na. Patajuh/Pangliman;
 - ca. Panyarikan;
 - ra. Patengen;
 - ka. Kasinoman desa;
 - da. Pesayahan (kelian tempekan)
 - ta. Pecalang
- (2) Prajuru Desa/Banjar patut:
- ha. Mawiwit saking krama ngarep.
 - na. Waras lan tan cacad angga

- ca. Maparilaksana becik lan nenten cacad
- ra. Jujur, pradnyan, wicaksana lan madruwe pangunadika, lascarya ngayah;

Tatacara Ngadegang Prajuru Desa :

Pawos 34

(1) Tata Ngadegang Prajuru Desa

- ha. Soang Banjar dados ngusulang 1 (siki) calon bandesa mawiwit saking krama ngarep suang - suang tempek ngemedalan calon Bendesa;
- na. Kawentenang prawartaka pemilihan, kamanggalaning antuk Prajuru Desa sane lawas, kawantu olih kelian / prajuru banjar sane kasudi;
- ca. Calon saking prajuru banjar kaselehin antuk prawartaka, raris kapastika wanten 3-5 calon bandesa; :
- ra. Pemilihan kamargiang ring wantilan pura desa utawi pura puseh, soang-soang kelian banjar patut nitenin lan nureksain pamargi pemilihan bandesa inucap;
- ka. Calon sane kacawis paling makweh sane Jayanti

(2) Prajuru Desa kadegang 5 warsa apisan olih Paruman Agung Desa Adat;

(3) Prajuru sane wawu kepilih kaupasaksiang ring Pura Kahyangan Tiga.

(4) Sajawaning wenten parindikan sios, sang sampun puputing panumaya, yening kayun dados Prajuru malih kengin kapilih malih;

(5) Prade Bandesa Adat mararian, sadurung panumayan ipun, swadarman nyane kamargiang Krama Desa ngawentenang parum agung malih lagi memilih Kelian Desa Adat.

Pawos 35

(1) Ritatkala ngamargiang kasukerthan Desa Adat, Bandesa kawantu olih :

- ha. Pangliman/Patajuh, pinaka Wakil Bandesa;
 - na. Panyarikan, pinaka Juru Surat;
 - ca. Patengen, pinaka Pangamong Druwen Desa;
 - ra, Kelian-kelian Banjar Adat;
 - ka. Kasinoman pinaka Juru Arah;
 - da. Pesayahan ngewantu prajuru Desa ritatkala kabuatan (keperluang)
 - ta. Pecalang sane nreptiang pamargi ritatkala wenten karya adat, budaya lan agama Hindu;
- (2) Ritakala ngenterang kasukertan ring niskala, Bandesa patut masinggihang Pamangku kahyangan Tiga miyah kahyangan desa tiosan;
- (3) Indik tata titi ngadegang pecalang, swadarman lan patitis ipun, kamanggehang manut pararem;

Pawos 36

- (1) Swdharmaning Bandesa Adat, inggih punika :
- ha. Ngenterang paruman-paruman Desa Adat;
 - na. Ngenterang panglaksanan sadaging Awig-awig miyah pamutus-pamutus Krama Desa. sane sinanggeh Pararem;
 - ca. Ngaraksa miyah nudonang tata-titine migunayang arta brana druwen Desa;
 - ra. Nuntun saha ngenterang Krama Desa rawuhing warga Desa sami, ngu-padi kasukertan sekala lan niskala;
 - ka. Nuntun saha nyaksi upacara sangaskaraning kahuripan sane mabuat;
 - da. Nuntun saha ngenterang Warga Desa, nginggilang Sang Hyang Agama, kasucian Khayangan, kasucian Palemahan, kasucian Pawongan, miyah tata-titine migunayang Setra;
 - ta. Mawosin miyah niwakang pamutus marep ring wicara krama;
 - sa. Maka Duta Desa Adat, matemuang babawos ring sapasira ugi;
 - wa. Lan sane sewosan sane wenten pakilitan nyane ring Desa Adat.
- (2) Tata-titine ngalaksanayang swadharma inucap ring ajeng, tan maren patut satinut ring daging Awig-awig, Pararem, dresta miyah pamutus paruman krama Desa Adat;
- (3) Panglaksanane ring ajeng patut kasobyahang ring Desa Adat, kapungkur ipun;
- (4) Sumakuta utawi sumanggup natak pamutus paruman Krama Desa Adat, ngenenin swadharman sowang-sowang prajuru;

Pawos 37

Swadarman Patajuh inggih punika ngawantu Bandesa ring widang Prahyangan, pawongan lan pelemahan

Pawos 38

Swadarman Penyarikan inggih punika ngawantu Bandesa ngaryanin saluir sewalapatra, nyatet inventaris desa tur nyuratang saluiring pamutus pangrawos desa ring sangkepan;

Pawos 39

Swadarman patengen inggih punika ngawantu Bandesa ngaryanin utawi ngarincik sakaluwir pangranjing miyah pamedal jinah Desa Adat lan ngupapira padruwen Desa Adat;

Pawos 40

Swardamaning Kasinoman lan Pasayahan Desa, ngewantu Bandesa nyobyahang sewalapatra utawi pamutus peagerawos desa ring tempekan desa;

Pawos 41

Swadarma Pecalang Desa ngawantu Bandesa nreptiang pamargin upakara yadnya, dharmaning Agama lan Dharmaning Negara.

Pawos 42

Patias olih-olihan Ian leluputan Pamucuk Desa Adat, manut Pararem;

Pawos 43

(1) Wusan dados Pamucuk Desa Adat, sangkaning :

- ha. Lina, padem;
- na. Pinunas ngaraga
- ca. Swadharman nyane sampun puputing sengker;
- ra. Kawusanang / kanorayang olih krama desa duaning iwang pamargi, manawi nilar sesana keni pamidanda manut pararem.

(2) Ngentosin, ngwusanang utawi nganorayang Pamucuk Desa Adat, patut kamargiang sajeroning Paruman Agung Desa Adat;

Pawos 44

Patiyas utawi olih-olianan prajuru desa luire :

- (1) Luput rarampen (peson-peson);
- (2) Polih tanding tengah;
- (3) Petias siosan manut pararem;

Palet 3

Indik Kulkul

Pawos 45

(1) Kulkul ring desa luire :

- Ha. Kulkul Pura;
- na. Kulkul desa;
- ca. Kulkul banjar/tempekan;
- ra. Kulkul sekaa-sekaa;

(2) Kulkul Desa tan wenang katepak yan tan manut kadi daging awig-awig puniki.

(3) Tabuh tetepakan kulkul Desa/Banjar pastika maseos- seosan luire:

- ha. Tengeran upacara yadnya Desa/Banjar, nung tiang (tung-ting-tung-ting).
- na. Tengeran ngawit nglaksanayang pakaryan sane sampun kawiarahang/kasiarang, tabuh bias atulud.
- ca. Wenten sinalih tunggil warga Desa/Banjar sane line/sede/padem, tigang klentungan (tung-tung-tung)
- ra. Wenten sinalih tunggil warga Desa/Banjar lanang istri sane mawiwahe, tigang klentungan banban kalanturang nung ting.
- ka. Tengeran wenten sinalih tunggil warga Desa/Banjar ngembasang/ngamijilang rare, aklientungan.
- da. Tengeran wong Desa/Banjar kaplagandang bulus atulud.
- ta. Tengeran wong Desa/Banjar san kaamuk bulus tigang tulud.

sa. Tengeran wusan maserep sangkan dasa klenlungan banban.

Pawos 46

- (1) Kulkul desa utawi banjar tan wenang katepak yening tan sangkaning pituduh desa, sajawaning tengeran kapancabhayana;
- (2) Sang nepak tan sangkaning pituduh patut digelis atur supeksa maka buatan panepake, yan tan sapunika wenang sang mamurug kadanda manut parerem;
- (3) Kulkul sekaa-sekaa, samalih kulkul pondokan tan kalugra nyawerin sukat utawi tengeran "I kulkul desa/banjar prade mamurug taler kadanda manut pararem;

Palet 4

Indik Paruman

Pawos 47

- 1) Paruman/sagkepan ring Desa Adat Dukuh Moncos. wenten :
 - ha. Paruman desa/banjar kawentenang:
 - 1) Nyabran ngasasih, maka cihna tan parah-arah, duaning sampun tetep panumaya manut pararem Desa Adat;
 - 2) Napkala (patgata kala) maka jalaran arah-arah manut tatuojon;
 - na. Sangkepan prajuru/ulu desa, kawentenang manut wiguna;
 - ca. Paruman sekaa-sekaa manut babuat;
- (2) Paruman desa utawi banjar madudonan sakadi ring sor :
 - ha. Prasida lumaksana ri sampun katedunin antuk sang patut ngamiletin kamanggala antuk tengeran kulkul miwah mabusana adat. saha tan kalugra makta gegawan lan tan maren ngarcana ring Ida Bhagawan Panyarikan maka sarana Widhi Widana Cane;
 - na. Maka sarana jagi pangawit kalaksanayang sep-sepan saha ri wusan nyacah kamargiang nawur dadosan gung alit manut pararem;
 - ca. Tan kalugra ngawetuang suara ghora utawi byuta, prade wenten makadi punika patut keni pamidanda bea pecamil kadi dandaning nguman-uman ring sabha;
 - ra. Pamutus babawos brijuk sapanggul (ingkup) punika kamanggehang;
- (3) Prade daging paruman tan kacumponin mangda prajuru desa/banjar ngilikang babawos, saha putusan nyane mangda kararemaning antuk krarna desa/banjar, samaliha prade tan prasida kasungkemin rawuh ping tiga, prajuru banjar wenang nunas bawos ring Kertha Desa manut undagan luire : kamanggeh paingkupan prajuru, ngraris panglingsir, panguntat paruman;

Pawos 48

- (1) Sajeroning paruman desa, Bandesa Adat patut nyiarang pamargi ngenterang desa, pamekas nganinin indik:
 - ha. Munjuk lungsuring pakraman saha ayah-ayah, suler artha brana druwen desa;

- na. Rencana prajuru nganinin utsaha desa kapungkur;
- (2) Pamutus paruman. desa manggeh pararem maka pamitegep awig-awig;

Pawos 49

- (1) Sangkepan prajuru desa kawenanggang ngrincikang utsaha desa kapungkur;
- (2) Sangkepan prajuru tan kawenang ngawedalang tategenan ring krama kaingkupin antuk krama desa;
- (3) Pamutus sangkepan prajuru ngawetuang paswara, maka pidaging pituduh sang ngawiwenang ngonekang pecak pararem krama, desa;

Palet 5

Indik Padruwen Desa

Pawos 50

- (1) Padruwen Desa Adat Dukuh Moncos sakadi ring sor :
 - ha. Kahyangan desa, luire :
 - 1) Kahyangan Tiga;
 - 2) Pura Melanting;
 - 3) Tapakan Ratu Gede, Ratu Ayu, Ratu Mas, Ratu Gede Lingsir.
 - 4) Pura UlunSwi
 - 5) Pura Taman Jenuk
 - 6) Pura Ring Tuwed
 - 7) Bijian Pura Ulun Suwi
 - 8) Bijian Pura Dalem
- na. Bale Desa;
- ca. Tanah tegalan;
- ra. Karang ayahan desa, karang ring ajeng;
- ka. Setra-setra palemahan, makadi setra pakingsan, setra pangarep;
- da. Pelaba pura, carik/tegal malinggah;
- ta. Lelanguan, minakadi tetabuhan Ian ilen-ilen padruwen Desa bebanjaran/tempekan luire;
 - 1) Gong Desa Adat;
 - 2) Banjar Tempek Kelod Angklung.
 - 4) Ilen-ilen wali pura; rejang, pendet, Desa Adat Dukuh Moncos.
 - 5) Lekita-lekita, luwire pipil krama, awig-awig, paswara/pararem lan sane siosan.
- sa. LPD Desa Adat Dukuh Moncos.
- wa. Pasar Desa Adat;
- la. Utsaha Desa Adat;
- ma. Nyasa, sasanthi;
- ga. Miwah sane lianan;

(2) Olih-olihan Desa Adat Dukuh Moncos luire :

- ha. Olih-olihan saking palaba Desa Adat
- na. Urunan krama desa Adat;
- ca. Paica saking Guru Wisesa;
- ra. Dana punia tiosan, sane patut;

Pawos 51

- (1) Prajuru desa wenang ngetanggang pamupon laba pura lan sapanunggilan druwen desa;
- (2) Pikolih Ian pamupon nyane kanggen prabea piodalan lan wawangunan ring pura;
- (3) Nyabran pasangkepan desa, prajuru pangamong druwe ngwentenang parindik munjuk lungsur padruwen ring krama desa adat.
- (4) Sakaluwir druwen desa patut wenten likitan nyane;
- (5) Tan kalugra ngadol utawi ngesahang druwen desa yan tan kasungkemin antuk krama desa adat.

Palet 6

Indik Panyanggran Banjar

Pawos 52

Krama desa ri kala karya suka-duka, patut kasanggra antuk banjar luwire :

- (1) Prade nangun Pitra Yadnya utawi Manusa Yadnya, manut pinunas sang mayadnya;
- (2) Pangrombo utawi karya gotong-royong krama nganti ping tiga, salangkungan punika patut katuran pangingu;
- (3) Pangingu ri kala Pitra Yadnya anut abot yadnya, prade saking semengan nganti wengi. katuran pangingu ping kalih manut Pararem.

Palet 7

Indik Pawiwahan

Pawos 53

- (1) Pawiwahan inggih punika patemoning purusa kelawan pradana malarapan panunggalan kayun suka cita kadulurin upasaksi sekala-niskala;
- (2) Pamargin pawiwahan iuire :
 - ha. Pepadikan, kamanggala antuk pakrunan;
 - na. Ngarorod,ngrangkat rihin wawu kakrunayang;
 - ca. Nyeburin utawi santana nyeburin;
- (3) Pidabdab sang pacang mawiwaha patut:
 - ha. Sampun manggeh daha truna (prasida nganutin Undang-Undang Perkawinan);
 - na. Sangkaning pada rena, (tan kapaksa);

ca. Kasudiang prade pangambile sios agama;

- (4) Pamargin pawiwahan mangda nganutin Undang-Undang Perkawinan saking sang ngawiwenang;

Pawos 54

- (1) Pawiwahan sane kapatutang ring desa, sakadi ring sor :

ha. Sampun kamargiang pabiakala utawi kasaksiang sekala-niskala;
na. Wenten pasaksi prajuru sane mapakelingan utawi ngilikitayang pawiwahan;

- (2) Parabian sane tan manut kadi ring ajeng sinanggeh tan patut;

Pawos 55

- (1) Sapa sira ugi pacang ngawarangan pakulawarganya patut masadok ring prajuru, salantur nyane prajuru maritatas, manut tan manut pamargi parabiane;

- (2) Pamargin Papadikan manut dudonan;

ha. Pakrunan rawuh ping tiga, saha soang-soang malarapan :

- 1) Kapertama antuk canang;
- 2) Kaping kalih antuk canang.
- 3) Kaping tiga, antuk tipat bantal, kabawos pamuput papadikan.

na. Ri sampun mapragat rarisi sang istri kajak budal ring pakubon sang lanang, saha kalanturang antuk pabyakala;

ca. Mangda puput tumus sekala niskala rarisi kulawarga purusa makta pejati ring merajan wadone;

- (3) Prade Ngerorod/Ngrangkat patut:

ha. Reraman lanange ngawentenang pamalaku antuk duta saksi sakirangnya 2 (kalih) diri;
na. Pagenahan antene tan kengin ring pakubon sang lanang sedereng mabiakala;

- (4) Sajeroning Pakrunan/panglukuan patut:

ha. Kamanggala antuk geng pangampura, majeng ring reraman wadone;

na. Kaigumang bawos indik idih-pakidih utawi palegayan arep ring pasewakan sang ngidih saha dewasa pakrabkambeyane wekas;

ca. Ka cihnyang indik kapurusa utawi prade santana rajeg kajejerang, kapatut ngidih anak lanang sane kabawos pawiwahan nyeburin, tur ri sampun sulur pamerasan kategepin kamanggehang santana nyeburin;

ra. Prade tan terima, pejati pakrunan kamargiang jantos ping tiga;

- (5) Pakrabkambean mapiteges upacara tinas apadang (tinglas) mapikuren, duaning manut sakadi ring sor :

ha. Prade wenten sane ngangkahan karang ulu / tedun gelung patut kaupekara Mepatiwangi manut Pararem

- na. Sajeroning kabawos ambe, kalaksanayang ring sekala niskala antuk sarana jejauman miwah pawidi widana :
 - 1) Jejauman pinaka ngambe/ngadungang kayun soang-soang pakulawargan wadonne;
 - 2) Widhi widhana pinaka pejati niskala nunas wadone ring pamrajan kamulan nyane;
- ca. Sajeroning bawos kerab kambe palaksana ring sekala :
 - 1) Antuk panyaksi krama banjar, duaning kakerabin manawi antuk tengeran kulkul;
 - 2) Pamekas panyaksi prajuru saha ngilikitaang;

Palet 8

Indik Santana

Pawos 56

- (1) Santana wenten kalih pawos, sane kaucap pratisantana miwah santana paperasan;
- (2) Pratisantana inggih punika santana sane metu saking pawiwahan kapatut;
- (3) Prade pawiwahan tan ngawetuang santana kengin ngidih santana antuk upasaksi sekala niskala sane kawastanin santana paperasan;
- (4) Prade pawiwahan tan kapatut ngawetuang santana, mangda tan kantun kawastanin babinjat utawi astra patut kamanggala antuk panyangaskara;
- (5) Santana rajeg inggih punika, pratisantana wadon (pradana) sane kamanggehang lanang (purusa) tur ri sampun nglaksanayang pawiwahan nyeburin;
- (6) Sang sane karsayang santana rajeg inucap mawiwit saking :
 - ha. Pratisantana wadon tunggal utawi silih sinunggil pratisantana wadon yanng makasami pratisentana wadon;
 - na. Sampun kamanggehang dados pratisantana (purusa);
 - ca. Kapawiwahan kaceburin, kautsahayang antuk jadma sane magama Hindu utawi jadma sane maagama siosan sane sampun nglaksanayang pamarisuda raga utawi sudi wadani;
 - ra. Sane kamanggehang santana rajeg patut masadok ring prajuru banjar tur kelian banjar nyiarang ring banjar saha ngaturang ring prajuru desa adat.

Pawos 57

- (1) Ngangkat santana anut dudonan patut maka cihna artha brana pamerasan sene kasaksiang sekala niskala;
- (2) Sapa sira ugi krama pacang ngangkat santana patut masadok ring prajuru adat sanistane asasih sadurung pamerasan;
- (3) Prajuru Adat/Bandesa Adat kawakilin antuk kelian banjar adat nyobyahang ring sawidangan desa/banjar, manawi sang sapa sira ugi rumasa tan lila, mangda masengker kalih wuku sadurung pamerasan masadok ring Prajuru Adat/Bandesa Adat;
- (4) Prajuru Adat/Bandesa Adat digelis mawosin saha ngicenin pamutus nepek ring catur dresta miwah pararem;

- (5) Prade sulur pamerasan tan manut kecapping ajeng, prajuru adat/bandesa adat wenang ngandeg sang pacang ngamargiang pamerasan, saha ngicenin pamutus mangda kapuputang rihin babawosan manut sulur utawi wicaran nyane;

Pawos 58

- (1) Paperasan sane kapatutan ring desa ri sampun maka cihna :
ha. Widhi widhana pamerasan;
na. Kasaksinin antuk prajuru desa sane makelingan utawi ngilikitayang;
ca. Kasobyahang ring wawidangan desane;
- (2) Sane kapatut peras anggen santana kadi ring sor :
ha. Jatma magama Hindu;
na. Kulawarga saking purusa, prade tan wenten kengin saking wadon, yaning taler tan wenten wawu kengin sakama-kama (saking kayun);
ca. Kautamayang saking waris pancer kapurusian;
ra. Sinalih tunggil mawiwit saking kulawarga tunggal sanggah utawi merajan, paibon lan dadia, utawi ngambil anak tios sakewanten sang magama Hindu;
- (3) Kengin ngangkat santana langkung ring adiri, lanang wiadin wadon;

Palet 9

Indik Nyapian

Pawos 59

- (1) Pawiwanan prasida kawusang malarapan antuk palas marabian utawi kalayu sekaran;
- (2) Wusan mapikuren riantukan silih sinunggil lina mapiteges balu, makadi balu. lanang/istri;
- (3) Palas marabian inggih punika sangkaning mawiwit wicara kabawos nyapian;
- (4) Sang ayat palas marabian patut atur supeksa indik pailikitan nyane rihin ring sang rumawos (Pengadilan Negeri) wastu tinas apadang pamutus nyane kabawos nyapian, wawu prajuru adat nyiarang kawentenannya.
- (5) Langkungan ring tigang sasih, nenten di nafkahai secara lahir batin sampun keuningayang lepas utawi mewali bajang daha manut secara adat
- (6) Prade adung malih patut mewidi widana malih tur keni penyangu banjar, Manut Pararem
- (7) Sang ayat palas merabian sedurung polih pamutus saking sang rumawos (Pengadilan Negeri), nenten kesaksiang saking prajuru Adat lan Dines.

Pawos 60

- (1) Tata cara palas marabian sakadi ring sor :

- ha. Nawur prabea pasaksi sinalih tunggil sami matenga manut parerem
 - na. Pagunakayan polih pahan pada;
 - ca. Pabekel tatahan soang-soang kakuasa niri-niri lan warisan kakuasa antuk purusa;
 - ra. Ngaweruhin miyah ngupajiwан pratisantana manut swadarmaning guru rupaka;
 - ka. Nawur pamidanda pangentos suaran kulkul manut pararem;
 - da. Ngelung jinah belong maka cihna palas marabian;
- (2) Prade riwekas sang palas kacihna adung malih, patut:
- ha. Ngamargiang pawiwahan malih nganutin pararem
 - na. Kadanda nikel saking palase;

Pawos 61

- (1) Sang balu kabinayang dados :
- ha. Balu luh wit santana (santana rajeg) miyah balu luh boyo sentana;
 - na. Balu muani kapurusa (wit sentana) kapurusa miyah balu muani nyeburin (boyo sentana nyeburin).
- (2) Swadarmaning balu inucap patut:
- ha. Ngamanggehang patibrata tan kengin ngamargiang paradara/ drati krama;
 - na. Nguwasayang waris gunakaya, tan dados ngadol, ngadeang, makidihang lan siosan punika, sajawaning kabebasang sakeng pianak utawi kulawarga pinih tampek saking perabi prade okane kantun alit-alit.
 - ca. Kengin ngidih sentana prade wenten pidabdab sadurung sinalih tunggil ring, saha kabebasang antuk kulawarga sinanggeh kapurusa;
 - ra. Kawenanggang mawiwaha malih yan wenten kabebasan manut aksara ring ajeng.
- (3) Balu kaucap tan pageh sakadi ring sor :
- ha. Drati krama utawi paradara;
 - na. Matilar saking pakubon tan pasadok jantos 3 (tigang) sasih;
 - ca. Lempas ring swadarma sios-siosan tan prasida ngesehin solah maprawerti arep ring pituduh kulawarga purusa.

Palet 10

Indik Warisan

Pawos 62

- (1) Warisan inggih punika artha brana saha ayah-ayahan ngupadi sukerta sekala niskala saking keluhuranya arep ring turunannya.
- (2) Karang sinanggeh warisan luire :
- ha. Duwe tengah, makadi tegal ayahan desa, khayangan, pasuka siwa karang, lan sane siosan;
 - na. Pagunakayan, tatahan/jiwa dana, hutang piutang.
- (3) Wawu kengin kabaos warisan prade wenten :

- ha. Sang mapiturun (pawaris)
- na. Katurunan (ahli waris);
- ca. Artha brana tategenan (ayah-ayahan) maka cihna warisan.

Pawos 63

- (1) Ahli waris, luire :
 - ha. Pratisentana purusa.
 - na. Pratisentana (sentana rajeg);
 - ca. Sentana paperasan (lanang/wadon).
- (2) Prade tan wenten sakadi ring ajeng ka sinanggeh ahli waris :
 - ha. Turunan purusa naenin ngunggahang makadi rerama, lanang, pekak, selanturnia, rerame misan, mindon;
 - na. Turunan purusa naenin ke sarping makadi kaponakan dimisan miwah mindon.
- (3) Swadarmaning ahli waris patut:
 - ha. Nerima, saha ngutsahayang tetamian pahan kaluhurannya, makadi ngrempon sanggagh/mrajan, pura, saha pangupakarania miwah ayah-ayahan pawaris;
 - na. Ngabenang pawaris saha nglanturang upacara-upacara Pitra;
 - ca. Naurin hutang-piutang pawaris manut panglokika.

Pawos 64

Mungguwing waris kawaris ring Desa Adat kamargiang makadi ring sor :

- (1) Ri sampun kalaksayang Pitra Yadnya Ian hutang-piutang pawaris tuntas katawur, wawu warisan dados kaepah.
- (2) Para ahli waris sami polih pahan sangkaning pagunakayan, sajawaning karang/tegal ayahan desa kaemong antuk ahli waris kang sinanggeh krama ngarep.

- (3) Sinalih tunggil ahli waris kengin tan polih pahan prade :
 - ha. Nilar kawitan lan sesananing agama;
 - na. Alpaka guru rupaka;
 - ca. Santana rajeg kesah mawiwaha utawi pratisentana nyeburin soang-soang kabawos ninggal kadaton.
- (4) Boya ahli waris, kengin muponin hasil manut dudonan, luire :
 - ha. Santana luh, selami durung kesah mawiwaha;
 - na. Balu luh wiadin muani nyeburin (soang-soang boyo sentana).
- (5) Pawaris kengin maweweh ri kala maurip pinaka jiwa dana, tatadan/ bekel, maka cihna paweweh tetep ring okane sane kesah mawiwaha.

Pawos 65

- (1) Prade sajeroning pakulawargan wenten ahli waris langkungan ring adiri patut:
 - ha. Kawentenang paigum indik pedum waris inucap;
 - na. Yan tan prasida katunasang tatimbang ring dulu-dulu desa (Kerta Desa);
 - ca. Prade taler tan wenten cumpu ring panepas Kerta Desa, patut kedauhang ring Kerta Desa prade taler tan kacumpunin, kengin katunasang ring sang rumawos (Pengadilan Negeri).
- (2) Prade karang inucap kaputungan, patut prajuru/dulu desa nibakang ring :
 - ha. Sang sinanggeh ahli waris manut pawos 63
 - na. Sang kengin anggen sentana manut pawos 56 miwah 57
 - ca. Prade taler tan wenten cumpu ring panepas Kertha Desa, kengin kautsahayang ring sang rumawos (Pengadilan Negeri).
- (3) Prade jantos karang desa kepah utawi kasepih, patut soang-soang nedunin makrama desa ngarep;

SARGAH LIMA SUKERTA TATA PALEMAHAN

Palet 1

Indik Karang, Tegal, Carik Ian Setra

Pawos 66

- (1) Krama Desa Pangemong karang paumahan, panegalan patut ngawentenang wates sane marupa tembok utawi pagehan;
- (2) Karang wiadin panegalan patut magaleng kadulu utawi kaluanan, teges ipun magaleng kaler wiadin kangin sane ngardi wates sane magenah ring tebenan (badelodan utawi badawuhan);
- (3) Yaning wenten karang desa kepah dados kalih utawi langkungan soang-soang kulawarga sane nanggap tur sane ngawentenang pamedalan patut nedunin makrama desa tur keni ayah ngarap;

- (4) Wates kawenangan/kadadosang ngangge tembok, pagehan miwah pal;
- (5) Yan wenten karang kabebeng, patut prajuru ngutsahayang wenten margi;
- (6) Prade wenten karang kaputungan wenang prajuru nyobyahang ring Krama Desa;
- (7) Yan wenten karang kaputungan wenang Prajuru Desa nibakang karang punika pertama ring turunan purusa naenin ngunggahang, ping kaiih ring purusa naenin kasamping, ping tiga ring krama tiosan sane magama Hindu;
- (8) Karang Desa, Karang Paumahan, Panegalan kaupapira sakala niskala manut Sastra Agama Hindu;
- (9) Setra wawidangan Desa Adat pastika wates nyane;
- (10) Setra desa adat wantah setra krama Desa Adat sane magama Hindu;
- (11) Indik migunayang setra patut masadok ring prajuru Desa;

Pawos 67

- (1) Tan wenang ngalah-alah karang, tegal, margi, genah sane sinangguh suci makadi kahyangan, setra lan sapanunggilan ipun;
- (2) Tan Wenang ngembahang toya, wit toyan hujan, toya wawalungan (limbah ternak), toya puwaregan (limbah dapur) lan sapanunggilan ipun kapakarangan tios;
- (3) Tan dados ngentungan/ngutang luwu, wangken wawalungan, tawulaning jatma kapakarangan, tegal, carik anak tios;
- (4) Tan wenang nunjel, nanem sawa yadiastun sawa karesian ring karang tegal/ panengalan wiadin sawah;
- (5) Yan murug kadi kecap ring ajeng patut ngawaliang wit wicarane tur kawewehan pamrayascita manut dresta lan sastra Agama sane kacumawisang ring pararem;

Palet 2

Indik Setra

Pawos 68

- (1) Setra wawidangan desa adat pastika wates nyane;
- (2) Setra desa adat inggih punika setra krama desa adat sane magama Hindu.
- (3) Indik migunayang setra patut masadok ring prajuru;
- (4) Nenten kapatutang makarya undung-undung utawi rumah kubur ring setra desa adat;
- (5) Muah sane tiosan sane mapakilitan ring setra lan pangupapiran nyane;

Pawos 69

- (1) Sinalih tunggil krama desa/banjar tan kalugra :
 - ha. Ngalah-alah margi, karang ayahan desa/ karang desa;
 - na. Ngalah-alah tanah tegak khayangan, lan setra, sekancan tegak sinanggeh suci.

- (2) Prade wenten sakadi ring ajeng, sang ngalah-alah patut ngwaliang tanah inucap saha pamidanda sapatutnya kadulurin upakara ring genah suci sane kalah-alah;

Palet 3

Indik Pepayonan Pawos 70

- (1) Ngawit nandur pepayonan, tanem tuwuh patut adepa agung ngajeroang saking wates, prade jantos ngliwat wates wenang kasepat gantungin;.
- (2) Yening wenten pepayonan ngungkulin, samaliha mawastu mayanin ka pisaga patut kawara antuk paiguman ping ajeng prasida sang nruwenang wit ngrebah utawi notor;
- (3) Prade sampun kawara taler tan wenten utsaha sang nruwenang wit, sang rumasa katetehan/kajerihan wenang masadok ring prajuru, tur ri sampun kaparitatas kalugra ngicalang wit inucap
- (4) Sang keni pamidanda panyangaskara saha prabea manut pararem arep ring wewanganan sang karubuhan luire :
- ha. Sang nruwenang wit sinanggeh mayanin, prade pungkat ngrubuhin wawanganan krama sios;
- na. Sang notor, munggul utawi ngrebah taru tur ngrubuhin wawanganan krama sios;
- (5) Krama desa patut ngamanggehang kawerdian tanem tuwuh sane ngawinan desane asri tur lestari;

Palet 4

Indik Wawalungan

Pawos 71

- (1) Sahanan warga desa sane mamiara wawalungan makadi bawi, sampi miyah sane tiosan ri sampun mabelas utawi sampun masaluk tali, patut sayaga nitenin negul/ nglogor mangda tan ngarusakin karang utawi paabianan krama sios. Bilih-bilih jantos ngranjing ngaletehin khayangan suci;
- (2) Prade wenten wawalungan malumbar utawi ngeleb ngarusakin karang/ paabianan krama sios, ri sampun kawara kengin kataban tur kadanda ngawaliang wit sane karusak saha nawur panebas papiaran tatabanan manut panglokikan prajuru desa;
- (3) Prade jantos ngaletehin genah suci minakadi pamrajan (Sanggah Kamulan), ri sampun kaparitatas antuk prajuru wenang sang nruwenang kadanda manut pararem Ian mrayascita genah sane kaletehin manut pararem, sapuniha taler prade nganti ngaletehin Kahyangan Desa utawi Pura Pamaksan sabinaning patut kadanda taler mangda ngamargiang pamrayascita manut pararem;
- (4) Krama desa patut nyarayanin wawalungan miyah sarwa prani, tan kapatutang maboros paksi miyah nuba ulam lan siosan punika prade wenten patut kadanda manut pararem

Palet 5
Indik Wawangunan
Pawos 72

- (1) Nyabran ngawangun patut:
 - ha. Masadok ring prajuru, ping ajeng prade wawangunan sane mapakilitan ring wates;
 - na. Ngangge gaguat Asta Bhumi miyah gagulak Asta Kosala-kosali, sanistane manut patitis niskala;
 - ca. Tan nyayubin kapisaga;
- (2) Prade wawangunan jantos nyayubin, bilih-bilih temboke ring telenging wates ri sampun kawara tur kasadokang ring prajuru, wenang kadanda manut pararem, saha tembok inucap kagubar utawi sanistane mangda kakaryanang abangan;

SARGAH ENEM WICARA, BHAYA, DUSTA LAN PAMIDANDA

Palet 1
Indik Wicara
Pawos 73

- (1) Sane wenang mawosin makadi mutusang wicara ring desa adat inggih punika prajuru desa, sane madudonan makadi ring sor :
 - ha. Bandesa Adat prade saling mawicara sami-sami ring patunggalan Desa.
- (2) Dudonan mawosin saha muputang wicara warga desa kadi ring sor :
 - ha. Kaping ajeng kabawosin antuk Prajatu Desa
 - na. Tan cumpu ring panepas Prajuru desa katunasang ring panglingsir Desa;
 - ca. Prajuru Desa tan katinutin raris nunasang ring Panglingsir Desa Kertha Desa
 - ra. Bandesa Adat tan prasida muputang wicara sane wenten raris katincapang ring paruman desa.
 - ka. Prade taler pamatut Paruman Desa tan kacumponin, sinanggeh wasananing pemutus sasampune polih tatimbang ring MDA. Kecamatan, miyah MDA Kabupaten lan MDA Provinsi;

Pawos 74

- (1) Sahanan wicara mawiwit kacorahan sakaluire sinanggeh nungkasin daging awig-awig, paswara miyah pararem desa, patut digelis kabawosin tan nyantos pasadok;
- (2) Sajaba wicara kadi ring ajeng patut nyantosang pasadok sang nunas bawos;
- (3) Panepase patut pastika nyantenang iwang patut malarapan antuk Tri Pramana (saksi, ilikita, bukti) miyah tan maren nepek ring Catur Dresta;

Palet 2

Indik Bhaya Lan Dusta

Pawos 75

- (1) Parindikan bhaya luire : jiwa bhaya, artha bhaya (kapandungan), dura cara ring agama miwah sane lianan;
- (2) Sang manggihin kahanan jiwa bhaya, patut nepak kulkul bulus mapitulung manut pawos 45 aksara sane ca.
- (3) Prade ring desa kahanan jiwa bhaya, patut desane ngalaksanayang Bhuta Yajnya tur sang mayanin katur ring sang rumawos;
- (4) Prade wenten jatma mamilisuh utawi nguman-uman ring paruman majeng ring jatma sios, patut keni pamidanda marupa bea pacamil kadi dandaning nguman-uman ring sabha;

Pawos 76

- (1) Sang manggihin kahanan artha bhaya (kamalingan), patut ngulkul mapitulung manut ring pawos 45 aksara sane da, utawi sang kamalingan atur supeksa ring prajuru desa sane pacang nandanin saha mawuwuh panyangaskara prade wenten jatma ngamaling barang sinanggeh suci;
- (2) Pratingkah mapailon ring dusta kabawos saruron, utawi prade wenten jadma manggihin maling tan nyadokang ring prajuru jantos jatma sios nyaduang, patut kadanda kadi dandaning maling, makweh pangargan dandan nyane manut cacakan dusta kamalingan nyane, tur prade rawuh ping tiga malaksana asapunika wenang kasukserah ring sang ngawiwenang;
- (3) Prade wenten jatma ngarereh reramon, minakadi daun kalapa, ron, muah sane lianan tan pasadok ring sang nruwenang, prade kacunduk (ketara) patut kadanda kadi dandaning maling;
- (4) Yening wenten jatma ngranjingin ka pakubon wiadin pakarangan tios ri kala suwung. mawastu sang madruwe karang kaicalan, wenang jatma inucap katuwekang antuk madewa saksi ring Pura Bale Agung. Mangda tan katuwekang manut ring ajeng, asing-asing ngranjingin pakubon jatma sios sane suwung patut:
 - ha. Matengeran suara (makaukan);
 - na. Nyantos sang nruwenang karang rawuh utawi masadok ring pangapit pinih tampek, maka buatan pangranjing;
 - ca. Pamedal karangnya kasawenin, maka cihna pangarah ri kala suwung;

Palet 2

Indik Pamidanda

Pawos 77

- (1) Desa/banjar wenang niwakang pamidanda ring warga desa sane sisip;
- (2) Paniwak inucap kamargiang olih bandesa/kelian banjar;
- (3) Bacakan pamidanda luire :
 - ha. Ayahan kasisipan;
 - na. Danda artha (dosa, danda saha panikel paturunan);

- ca. Rarampagan;
 - ra. Kadaut karang ayahanya, utawi kasepekan;
 - ka. Panyangaskara;
 - da. Kawaliang pipil nyane (kawusang makrama);
- (4) Pamidanda sane katiwakang patut masor singgih manut ring kasisipane;
- (5) Jinah utawi arta brana pamidanda ngranjing dados druwen Desa'
/Banjar;

Pawos 78

- (1) Krama sane langkungan ring tigang paruman nglantur tan nawur urunan miyah dadandan wenang karampag;
- (2) Parampagan ngangge tata cara, kadi ring sor :
 - ha. Kalaksanayang antuk prajuru kasarengin antuk krama desa tigang diri maka saksi;
 - na. Sang ngrampag madasar darsana ngambil barang utawi nyawenin tanem tuwu, akehnya manut ring hutang sang karampag;
 - ca. Prajuru miteketang mangda barang-barang sane karampag digelis katebus, masengker awuku ring arahina prade ngelangkungan dados padrawen desa;
 - ra. Sane patut kaimpasin sajeroning ngamargiang rarampagan inggih punika, tan nganinin saluwir barang sane patut inggilang manut agama miyah mademang pangupa jiwa sang karampag;

Pawos 79

- (1) Prade sang pacang karampag ngwara (ngalangin) pamargi inucap mawastu sampun tan nganutin utawi nenten ngalinguang sadagingin awig-awig desa wenang jatma punika kapiteketin indik sulur miyah atiti krama dados krama desa adat mangda prasida nginutin sasanan krama manut pangajah Agama Hindu;
- (2) Prade mamengkung, maparilaksana nyapa kadi aku, wenang karang desa sane kagenahin antuk jatma punika kadaut antuk desane utawi kasepekan;
- (3) Samalih yan purun taler ngalangin pamargi kadi ring ajeng tan wenten pamargi sajawaning kawaliang pipil nyane (kawusang makrama);
- (4) Pamidanda inucap ring ajeng keni batas risampun sang kadanda punika ngamargiang :
 - ha. Nunas geng pangampura ring krama desa riantukan nguak pasubhaya (perarem) pecak;
 - na. Nawur pangargan panguwak pasubaya duk pacang karampag kadulurin pamrayascita;
 - ca. Prasida katampi malih makrama duaning sampun sida ngesehin solah prawertin nyane;

SARGAH PITU NGUWAH-NGUWUHIN AWIG-AWIG

Pawos 80

- (1) Nguwah-nguwuhin awig-awig desa punika kamargiang antuk paruman desa;

- (2) Paruman inucap mangda kadasarin antuk pakarsan krama desa adat yadiastun kamedalang antuk prajuru sinunggal wiadin sinarengan;
- (3) Awig-awig puniki kamargiang ngawit kaingkupin (kararemin);

Pawos 81

- (1) Sakalwiring sane wenten saderengnya patut kanutang ring sadagingin awig-awig puniki;
- (2) Sakalwiring sane durung kabawos sajeroning awig-awig puniki patut kamargiang manut tata cara sane sampun ketah mamargi kadulurin antuk pararem-pararem;

SARGAH KUTUS

SAMAPTA

Pawos 82

- (1) Awig-awig puniki kawastanin Awig-awig Desa Adat Dukuh Moncos
- (2) Awig-awig puniki kamargiang kasungkemin ring paruman Desa Adat Dukuh Moncos

Pawos 82

- (1) Awig-awig puniki kasungkemin ring paruman Desa duk rahina wraspati umanis wuku dungulan Sasih ka lima, icaka warsa 1939 tanggal masehi 02 November 2017 ring Bale Banjar Desa Adat Dukuh Moncos.
- (2) Awig-awig puniki kelinggatanganin antuk Bandesa, kesarengin Kelian-kelian Banjar/tempekan saha kasaksinin antuk Kelian-kelian Banjar Dinas miwah Perbekel sawidangan Desa Adat Dukuh Moncos, Camat, Mengwi, MDA lan Saha Kapikukuh antuk Bupati:

Prajuru/Dulun Desa;

Bandesa Adat Dukuh Moncos




I Made Sukada

Penyarikan Desa Adat Dukuh Moncos

I Made Agus Hendra Wijaya

Kelian Banjar Adat,



I Wayan Satra

Kelian Dinas Dukuh Moncas



I Nyoman Sukayadnya

Perbekel Desa Sobangan

Camat Mengwi

I Ketut Mas Budiarta S.H

I Gusti Ngurah Gede Jaya Saputra, Ssos.MAP
NIP : 19750207 199311 1 002

Majelis Alit Kecamatan

Majelis Madhya Desa Adat
Kabupaten Badung,

I Made Widiada, SH.MKn.

Ida Bagus Anom

Murdha Pamikukuh

Bupati Badung,

I Nyoman Giri Prasta, Ssos.

Telah didaftarkan dan dicatatkan pada Dinas Kebudayaan Badung.

Pada tanggal :

Reg. Nomor :,.....